

**01 IANUARIE
RUGĂCIUNEA
SF. IERARH VASILE CEL MARE,
ARHIEPISCOPUL
CEZAREEI CAPADOCIEI**

1

Молитва

О всесвятый отче Василие Преславный!
Всея вселенная Церкви учителю;
бодрственный словеснаго Христова стада
пастырю и предобрый наставниче!
Неизмеримая Богословия пучино!
Непостижимых Божиих Таин
всеискуснейший испытателю, и вернейший
толкователю и сказателю; первейший
общаго монашескаго жития
законоположниче и основателю; пресветлое
чистоты и целомудрия зеркало; прекрасный
смиреномудрия и кротости взоре; живой
терпения образе, правило воздержания,
искренний нищеты и нестяжания
хранителю же и любителю; мужественный
Боготпротивных ересей разорителю, и
крепкий победителю; непреоборимый
Триипостаснаго Божества защитниче;

славы и чести Пресвятыя Троицы
всеусерднейший поборниче; теплейший
Матери Божия рачителю и Ея
Пренепорочнаго Девства и Матеро-Божия
преизбранный исповедниче и преизящный
заступниче. Се аз окаянный, и
многогрешный, смиренно припадая молю тя
о всемирный Христовыя Церкви учителю!
Ты научи мя тако благоговейно, стезями
заповедей Божиих шествовати и
богобоязненно ходити, да никогдаже на
путь, Божиим повелениям противен
сворачуся, или уклонюся; ты, грубый мой
разум умудрай, просвещай и вразумляй, да
всегда горняя мудрствует,
присноБожественная в ум пестунствует, и
мене унылаго к восприятию оных на всяк
день понуждает и приуготовляет; ты,
многоразвращенную волю, и весьма к
благому заледеневшую, разжжи и распали,
во еже бы ей земная презирати,
маловременных не желати, мимотекущих
гнушаться, Небесных же и вечных искренно
желати, и всегда теми мысленно утешаться
и услаждаться; память мою сице исправи
да незабвенно о сем памятствует мне же на

всякий час сие воспоминает: чесо ради создан есмь и в числе живых вчинен и вменен; еще настави ю да воспоминающе сия: ими же Преплагаго моего Творца и Создателя огорчих, понуждает мя искренно всех тех каятися, горько рыдати, от всего сердца болезновати и умильно с кающим Давидом глаголати и вещати: грех юности моея не помяни, и не вниди в суд с рабом Твоим, яко неоправдится пред Тобою всяк живой; вем прелблагий отче, яко весь исполнился безмесных дел, и студных деяний, всеми бо моего тела чувствуи многократно и многообразно неизреченную Божию Благостыню тягостно прогневах, и жестоко раздражих: сего ради прилежно прошу тя и всеусердно молю, отселе управляй зеницы моих очес помраченная мира сего суетою, да более невзирают на доброты мирския неполезныя, ниже прилепляются красотам вежды человеческия прельщающим.

Слух же ми воспящая, от внимания и слышания неполезных бесед, и неугодных повествований, но паче понудих вниманию Божественных Писаний, и слышанию

Евангельских повелений и поучений. Скверная моя уста, и нечистый язык, тако глаголати устрой и вещати научи, да та никогда же обрящутся празднословная, лжеглаголивая и злоречивая. Руце мои многими осквернившися студодеянии, Богоугодная делати настави; к добрым и полезным простиратися убеди, блюсти же ся всякаго сицеваго грехопадения научи, им же душа и тело безместно оскверняются, и нечиста пред Всевидящими Очесы являются; непопусти ногама моима, паче же запрети и возбрани, теми стезями ходити, еже удалятися творят создание от Вселюбезнаго Создателя, но сохрани я от всякаго поползновения, и от всякаго соблюди душевреднаго грехопадения. О, добрый жития человеческого управителю и строителю, сице вся моя уды управи, яко не быти уже им прочее орудием греха студодеяния, блуда же, нечистоты, и всякия неправды, но орудием добродетели, благоговения, целомудрия, воздержания и чистоты. Аз убо окаянный и скверный, отселе, всеми моими греховными гнушаюся мерзостями, и отселе прилежно и

всеусердно присное твое овча быти желаю,
упаси убо мя на живоносных пажитях,
снабди мя от лютых и хищных зверей,
непопусти твоим предстательством, быти
мне от тех пожерту и поглощенну, иже по
вся дни и нощи на мое свирепо наветуют, и
устремляются уловление, и на мое своя
расширяюще уста поглощения, яросно зубы
понуряют, но тако мя от их злокозненных
наветов защиты, и от сетей исторгни, яко
же исторгнул еси онаго беднаго юношу,
самопроизвольно вдавагося льствому
сатане, и своеручным писанием адския
тьмы князю данным, свое от
Вселюбезнейшаго Создателя и Дражайшаго
Спасителя отступнление утвердившаго.
Сотвори мя, твоим многомогущим
ходатайством, истиннаго сих твоих
добродетелей подражателя, имиже Богу и
всея твари Содетелю благоугодил еси, и
Всемиловитую Его Благостыню
благоветливу сотворил еси: сотвори мя в
Вере тверда, постоянна, и сице
непоколебима и неподвижима, яко, да ни
малейшая сумнения, или недоумения сень,
во мне когда обрящется; укрепи мя в

надежде и уповании, да всегда вечных благ благонадежен пребываю; возжги и воспламени в сердце моем истинную к Богу Любовь, омерзи вся земная и временная, да всею душою Небесных возжелаю, и оными надежно услаждаюсь; исходатайствуй мне нелицемерное покаяние, истинное за прегрешения жаление, да прочее живота моего время в истинном и Богоприемном провожду покаянии, и в сердечном умилении, и в сем душеполезном деле, постоянно и неподвижно пребуду, даже до последняго моего издыхания; егда же час моего скончания приблизится, и время от сего мира отшествия приспее, ты, о преблагий отче, с Преблагословенною Девею Мариею, ускори на помощь, ты защити мя, от злобных диавольских нападений, и враждебных наветов; ты сподоби мя общника быти прекрасных Райских Селений да купно с тобою, и со всеми святыми Богу благоугодившими, неприступнаго Божия Величества Престолу предстану и Живоначальную, Единосущную и Нераздельную Троицу прославляю, и воспеваю, в бесконечные веки, Аминь.